

353
KEV UA TIMKHAWV

Kuv yuav niajhnub ua tus Tswv tsaug, kuv yuav qhuas nws tsis tu tsis tseg mus li.

Kuv yuav qhuas nws vim tej haujlwm uas nws twb ua los lawm. Thov txhua leej neeg uas raug luag quabyuam, cia li nloog kuv tej lus thiab zoo siab.

Sawvdaws cia li nrog kuv qhia tus Tswv lub hwjchim loj rau luag paub, thov ib tsoom sawvdaws cia li ib txhij qhuas nws lub npe.

Kuv tsa ncauj thov tus TSWV, nws teb kuv tej lus thov, nws ua rau kuv tej kev txhawj ntshai ya lawm tas.

Cov neeg uas raug kev quabyuam, tos rawv nws pab lawv, lawv zoo siab luag ntxhi, lawv yuav tsis plam lawv tej kev cia siab ib zaug li.

Thaum cov neeg txomnyem thov nws pab, nws teb lawv tej lus thov. Nws pab cawm lawv dim puas tsav yam kev nyuajsiab uas lawv raug.

Tus Tswv tus tubtxib saumntuj zov rawv cov neeg uas hwm tus TSWV, thiab cawm lawv dim tej xwmtxheej.

Nej sim ntsia saib, tus TSWV muaj lub siab dawb, siab zoo npaum li cas. Cov neeg uas los vamkhom tus TSWV, cov neeg ntawd tau koobhmoov.

Tus TSWV haivneeg es, nej cia li hwm tus TSWV. Nws pub ib puas tsav yam rau cov neeg uas nloog nws lus raws li tej uas lawv yuav tsum muaj.

Tej tsov ntxhuav txawj tu puas noj thiab yoo tshaib, tiamsis cov neeg uas nloog Vajtsv lus, yuav tsis tu tej yam zoo hlo li.

Kuv tej me tubki es, nej cia li los ntawm no, thiab nloog kuv hais mog. Kuv yuav qhia nej paub hwm tus TSWV.

Nej yeej nyiam ua neej nyob lomzem ntxhias xwb los sav. Nej yeej xav tau txojhia ntev, thiab nyob kajsiab lug ne, puas yog?

Yog li ntawd, nej tsis txhob hais tej lus phem thiab lus dag.

Tso plhuav txojkev phem tseg, los ua tej haujlwm zoo, muab siab rau ua kom tau nrog luag nyob sib haumxeeb.

Tus TSWV saib xyuas nraim cov neeg ncajnrees, thiab nws nloog ntsoov lawv lub suab thov.

Tiamsis nws tawmtsam cov neeg ua phem, thaum lawv tuag mus, tsis muaj leejtwg nco txog lawv hlo li lawm.